

Abiadura Handiko Trenaren aurkako asanbladak 162 talderen babesa jaso du

■ Bihar manifestaldia egingo dute Gasteizen

Efe / Gasteiz

ABIADURA HANDIKO TRENA begi txarrez ikusten duten 162 talderen babesa dutela esan zuten atzo Gasteizen tren horren aurkako batzarreko kideek. Babes hori gogoan, behin eta berriz aldarrikatu-tako kexua berriz ere lau haizeetara plazaratzeko, bihar Arabako hiriburuan manifestaldia egingo dutela esan zuten.

Izan ere, asanblada horretako kideek gogor kritikatzeko dute EAEn tren hori dela eta egindako proiektua —Euskal Y deritzona— beraien ustez kalte ekonomiko zein ekologiko handiak ekarriko baititu. Atzo, berriz ere, uste horien guztien berri eman zuten. Gainera, batzarkideek adierazi zuten, Eusko Jaurlaritzak proiektu hau abian jartzeko —lehenengo zatia Arkaute eta Aramaio artekoa litzateke— presa handia du, zeren eta, gaur egun Europako Batasunak proiektu hau oso garrantzitsutzat jotzen badu ere, hori berehala aldatu baitaiteke. Izan ere, 1999. urtean Europako Batasuna trenbide sarean dituen lehen-tasunak berriro aztertzen hasiko da eta asanbleakideen ustetan litekeena da proiektu honek orain duen lehentasuna galtzea. Horrek, haien ustetan, areagotu egiten du Jaurlaritzako arduradunen ezinegona.

Proiektu hau inoiz gauzatzeko hasi ez dadin, ordea, garrantzitsutzat dute biharko manifestaldia, eta bertan partze hartzeko gonbit berezia egin zuten atzo Gasteizen talde horretako kideek. X



UAGNeko ordezkariak atzo egin zuten agerraldia.

JOXE LACALLE

Itoizko proiektua «berehala» burutu dadin eskatu du UAGNk

Atzeratzen den urte bakoitzeko 28.000 milioi galtzen direla dio

Nafarroako Nekazari eta Abeltzainen Batasunak (UAGN) hitz emandakoak bete eta Itoizko proiektua lehenbailehen burutzeko eskatu zuten atzo. Sindikatuaren arabera, behar-beharrezkoa da, epaien zain geratu gabe, urtegiaren eta Nafarroako Ubidearen proiektuan aurrera egi-tea. Haien iduriko, bi lan horiek atzeratzen diren urte bakoitzeko ia 30.000 milioi pezeta galtzen ditu foru erkidegoko ekonomiak.

Agentziak / Iruñea

Nafarroako nekazari eta abeltzainen sindikatu nagusiak, UAGNek, agindutakoak bete eta «behingoaz» Itoizko urtegia eta Nafarroako ubideko proiektuan aurrera egiteko beharra azpimarratu zuen atzo Iruñean. Angel Eraul sindikatuko arduradunak azaldu zuenez, «nazkatuta» dauz-kate «bete ez diren promesek, epaitegien erabakien zain egon beharrak eta batez ere proiektu honi alderdi politikoek atera nahi izan dioten probetxu arduraga-beak».

Sindikatuak arduradunek gogoratu zuten, Nafarroako

Gobernuak berak egindako kalkuluen arabera, proiektua atzeratzen den urte bakoitzeko 28.000 milioi pezeta (mila milioi liberatik goiti) galtzen dituela foru erkidegoko ekonomiak, bereziki nekazaritzak. Hori guztia dela eta, Iruñeko eta Madrilgo gobernuak eskatu zuten «berehalakoan» sina dezaten Nafarroako Ubidearen finantziario akordioa eta tramita dezaten ubidearen lehenengo faseari dagokion proiektua. Horrezaz gainera, Nafarroako Gobernuari zuzenduta, eskatu zuten ubide horrek hartuko dituen ureztatze eremuak zehaztu eta Ureztatze-sailen Foru Egitasmoa onar dadin.

Eraulen arabera, ubidearen proiektua «funtsezkoa» da Nafarroaren etorkizunarentzat, «foru erkidegoa garapenaren burura eramatea ahalbidetuko baitu». Sindikatuko arduradunak gaineratu zuenez, urtegia bete eta ura ureztatze-sailletara bideratzen ez bada, Nafarroako inguru asko erabat lehor eta hutsik geratuko dira.

Eraulen iduriko, proiektu hau «lardaskeria administratibo eta prozedurazkoak jositako egon da». Hala eta guztiz ere, erabat sinetsita dago proiektua burutuko dela azkenean, «behar-beharrezkoa delako eta beste alternatibarik ez duelako». X

Beriaingo gatz-putzua hondakinez bete eta erabilera publikorako berreskuratuko da

■ Elkarlan hitzarmena sinatu zuten atzo Nafarroako Gobernuak eta kontratistek

Europa Press / Iruñea

BERIAIN-EN (Nafarroa) Potasako meategi zaharretik ateratako 240.000 metro koadro gatz hondakin biltzen dituen putzua erabilera publikorako berreskuratuko da lau urteko epean. Eraikuntzako hondakin eta lurrez putzua bete egingo dute eta bertan 30.000 metro koadroko parkea sortuko. Haren ondoan, beste bi gune prestatuko dituzte, non zuhaitzi zabalak eta kirol instalazioak izango diren.

Nafarroako Ingurugiro Sailak eta Herrilantetako Enpresa Kontratatisten Elkarteak (ANECOP) atzo sinatu zuten Iruñean lan

hori aurrera eramanez ahal izateko hitzarmena. Proiektuak 634 milioi pezetako aurrekontua du —25 milioi libera pasa—. Nafarroako Gobernuak 203,76 milioi jarriko ditu; ANECOPek, berriz, putzua betetzeko lanak eta materialen garraioa hartuko du bere gain.

Yolanda Barcina Ingurugiro kontseilariak atzoko sinaketa ekitaldian azaldu zuenez, proiektu honek emaitza bikoitza izango du: alde batetik, hondatutako inguru baten berreskurapena, eta bestetik, kontrolrik gabeko zaborteak sortzea bertan.

Ekimen honen bultzatzaileen arabera, eraikuntzatik sortutako

hondakinak material egokiak dira oso euriak edota beste isurkari batzuek gatz urtu eta barreiatu ez dezaten. Hori dela eta, Beriaingo putzua estaliz gero, inguru horretan ez da batere arriskurik izango. Jose Joaquín Senosiain ANECOPeko lehendakariak azaldu zuenez, potasen ekoizpenak sortutako hondakin-putzua erre-kuperatzeko ekimena aitzindaria da European.

Beriaingo putzuan gatz kantitate handia dago paretetik urrutien dagoen gunean. Punturik garaienean hondakinek 27 metroko goratasuna dute, 240.000 metro koadro inguruko eremuaren gainean. X

Anestesia epidurala erabili zuten iaz EAEn %70 erditzetan

■ Gaur egun aukera hori edonoiz eta edonori eskaintzen zaiola dio Azkunak

Gorane Agirre / Bilbo

EUSKAL AUTONOMIA ERKIDEGOKO (EAE) ospitaleetan iaz izan ziren erditzeen %70etan anestesia epidurala erabili zuten. Kopuru hori %83,7ra igotzen da Gurutzetako Ospitalean. Anestesia mota hori gaur egun Osakidetza ospitaleetan «edonoiz eta edonori» eskaintzen zaiola adierazi zuen atzo Iñaki Azkunak, Eusko Jaurlaritzako Osasun sailburua.

Gurutzetako Ospitalean 1973. urtean hasi ziren anestesia epidurala erabiltzen erditze gutxi batzuetan (%12 inguru). Hogeita bost urteren buruan, erditzeak atxikitzen dituzten Osakidetza ospitale guztietan erabiltzen dute; hau da, Txagorritxu, Arrasate, Aranzazu, Zumarraga, Mendara, Gurutzeta eta Basurtuko ospitaleetan.

Anestesia epiduralak dilatazioa eta haurraren irtete prozesua luzatzen baditu ere, erditzean erabil daitekeen teknika anestesiko onena dela nabarmendu zuen Francisco Rodríguez, Gurutzetako Ospitaleko Ginekologia zerbitzuko burua. Ildo horretan, anestesia horrek eskaintzen dituen abantailak aipatu zituen: amari eta ume-ari kalterik ez egitea; amak erditzea bizi eta umea jaio ahala ikusi ahal izatea; anestesia lokalaren dosi txikiagoak behar izatea; eskari analgesikoak indibidualizatuak izatea, eta erditze dinamikan interferentzia txikiena izatea.

Dena dela, epidurala kasu orotan erabilgarria ez dela jakinarazi zuen Carmen García, Gurutzetako Anestesiologia zerbitzuko burua. Kontraindikazioen artean, amaren aurkako joera, gaitz neurologikoak edo koagulazio alterazioak aipatu zituen.

Anestesia mota horren erabilera kopurua ugaltzeko ez duela azpimarkatu zuen Rodríguez. Zesareen igoera (1987an %10,4 eta 1997an %13,6) beste faktore batzuen ondorioa dela zehaztu zuen; besteak beste, jaiotze tasaren jaitsiera eta erditzeko adina atzeratzea.

Azkunak eman zituen datuen arabera, «1988-1992 bitartean 6 ama hil ziren, eta 1989. urtean heriotza tasa perinatala milatik 9,45ekoa izan zen. Tasak onera egiten segitu du, eta iaz milatik 6,26koa izan zen. Bestalde, umearen heriotza tasa 1992. urtean Europako onenetakoa zen, milatik 6,7koa, eta behar jarraitu du: 1995ean milatik 5,68koa izan zen». X

Ekainaren 12an
ostirala
arratsaldeko 7etan
Udal Plazan

euskaraz
ikasteko
eskubidea

Antolatzailea: SORTZEN

Laguntzaileak:

BATZARRE - EA - EAJ-PNV - HB -
CCOO - CGT - ELA - LAB - STE-ELAS -
OINARRIAK - NIE - IA